

Nel Oduber:

Proyecto Fisher Man's Beach Resort

ORANJESTAD(AAN) — For di aña pasa partido MEP a tuma nota cu un grupo local a entrega un proyecto pa construcion di un hotel cerca Ministro Charro Kelly di Obranen Publico. E grupo a haya un tereno di mas o menos 40.000 m pa desaroya un proyecto pa un hotel di 462 camber di primera clase, un casino grandi, un night club, un cocktail lounge, restaurants y cafeteria's, salanan pa reunion, espacio pa oficina y espacio pa tienda, varios otro lounges, lobbies, bars y otro cosnan.

Na mas cu un ocasion fraccion di MEP a puntra pa e garantia aki, mirando cu e mester bin Staten pa aprobacion di e garantia. Segun Sr. Oduber MEP a haci un apelacion na e Presidente di Staten y coleganan di coalicion pa eherce influencia ariba gobierno pa manda tur documentonan ora di un proyecto grandi na tempo. No warda te ultimo ora, pone tur presion di tempo ariba Parlamento, mientras cu e proyecto ta drumi cerca Gobierno.

Sr. Oduber a analiza e proyectonan, unda nan ta ilustra e diferencia. El a bisa cu ariba un bon dia a aparece den Staten e Ministro di Finanzas pa duna splicacion

vocalmente di e proyecto "The Palm Reef Island" y cu mester un garantia pa \$1 Miyon. Logicamente segun Sr. Oduber mester a splike cu segun e constucion garanta ta worde duna mediante ley cu no por traha na e manera amateuristico cu gobierno kier traha.

Despues ariba un otro dia MEP a haya documentonan - no completo pa sin studia e proyecto duna garantia mediante carta na dos proyecto. Uno ta "Ramada Renaissance" y e otro ta "Coral Reef Project" cual nan garantianan tabata respectivamente \$ 42 Miyon y e \$18 Miyon, pa un total di \$60 Miyon.

Ministro Engelbrecht a wanta e proyectonan aki te ora e momento di firma a yega y si Staten no pasa e garantia aki e dia ey, lo a perde financiamiento pa tur dos proyecto. Sr. Oduber a sigui bisa cu "Ramada Renaissance" a keda drumi for di Mei 1987 te fin di September 1987 den lachi, pasobra e proyecto di MEP "Coral Reef" a keda den lachi, pasobra gobierno a keda pega cu e carta cu mester paga pa e warda di polis.

Ministro di Finanzas tabata kier pa promer cu trata e cartanan di ga-

rantia, Parlamento duna okay. Tanto MEP como e otro partidonan a demostra nan voluntad, lagando un comision di juristanan den Staten studia con nan por yuda sin viola e constitucion. Segun Sr. Oduber porfin MEP a bay di acuerdo pa scapa e proyectonan pa promer cu trata e leyman di garantia duna un carta cu Parlamento ta dispuesto pa coopera cu ambos garantia.

MEP a propone pa den ambos proyecto gobierno no duna 100 porciento di garantia, pero p.e. 80 porciento ya e ora esnan cu ta bay gana tur e placa tambe ta core poco riesgo. Gobierno y coalicion a nenga den tur dos caso.

Di cuatro proyecto cu gobierno a trata na un forma descabella ta Hyatt, segun Sr Oduber. Un par di dia promer cu MEP por trata den Comision Central e ley pa garantia, MEP a ricibi un mapa cu mas cu 800 papel pa studia. Mirando e falta di respet cu gobierno ta trata Staten, fraccion di MEP no a presenta pa e reunion ey.

Den reunion publico Sr. Oduber a bisa, MEP a haci nan pregunta nan y a coopera pa e garantia di Hyatt cu total ta mas cu \$ 60 Miyon. Hopi tempo MEP a tende cu Fisherman's Beach Resort Project ta cla.

A dura 3 luna entre Raad van Advies y gobierno pa porfin MEP ricibi solamente e proposicion pa garantia di SW. Fr. 64.826.700,- lo cual ta mas o menos \$ 40 Miyon, Diavienes atardi siman pasa, esta dia 11 di Maart 1988, como miembro di Parlamento.

E reunion den Comision Central lo ta Diamars dia 15 di Maart 1988 pa 4'or di atardi. MEP a ricibi, manea ta custumber di e gobierno, atrobe nada nada di e proyecto aki. Atrobe gobiernu ta demostra con falta di respet e tin pa Parlamento. Gobiernu ta drumi lunanan largo cu e proyecto, despues ta pusha Staten cun'e, anto si bin hopi pregunta gobiernu ta bisa cu Staten ta stroba eheucion di e proyecto.

Segun sr. Oduber MEP a fada pa e actitud arrogante y grocero di gobiernu. Fraccion di MEP lo no haci ningun pregunta, sino solamente ariba e procedura

y lo bin ampliamente den un reunion publico directo ariba e proyecto aki. MEP lo exige si pa durante 2 siman tur documento relata cu e proyecto worde poni na disposicion di parlamento pa por studia nan na un manera responsable.

E wegá di cierto gobernantenan di AVP bisando inversionistanan cu e proyecto por bin cla liher si fraccion di MEP no haci pregunta segun Sr. Oduber a caba. MEP a exige pa den e reunion publico MEP haya suficiente tempo pa trata un garantia di mas cu \$ 40 Miyon. E gobiernu aki tin e pueblo ya caba hipoteca pa mas cu 300 Miyon Florin.

Fraccion di MEP a propone pa mescos cu a trata "Coral Reef", Ramada Renaissance" y "Hyatt Project" duna Fisherman's Beach Resort un trato igual. Coalicion a bay contra proponiendo pa no trata e proyecto awe y pospone e reunion te otro fecha.



Aña pasa den luna di December familia Hernandez a haya banda di caminda benta un parha masha bunita y straño. E parha aki a resulta di ta morto, parce cu e mester a dal contra waya di coriente. Debi cu e parha aki ta asina bunita familia Hernandez a hibe pa e ser balsema. A bin resulta despues di ta un aquila e parha aki ta. Familianan Hernandez/Croes ta desea di bende cu cualkier persona interesa.



Durante e cowboy party Diasabra anochi na marinsportcentrum na Eagle tambe tabata tin eleccion di e trahe di cowboy. E premionan a worde gana pa Anet v.d. Der Walle, Mojra Heymink y E.D. Wagenaar. Ariba e foto por mira e tres ganadornan den nan traje di cowboy.